

Na osnovu člana IV. 4.a) Ustava Bosne i Hercegovine, Parlamentarna skupština Bosne i Hercegovine, na 16. sjednici Predstavničkog doma, održanoj 11. i 30. oktobra 2007. godine, i na 9. sjednici Doma naroda, održanoj 29. oktobra 2007. godine, usvojila je

## **ZAKON O AGENCIJI ZA PREDŠKOLSKO, OSNOVNO I SREDNJE OBRAZOVANJE**

### **DIO PRVI - UVODNE ODREDBE**

#### **Član 1. (Predmet Zakona)**

Ovim zakonom osniva se Agencija za predškolsko, osnovno i srednje obrazovanje (u daljnjem tekstu: Agencija), uređuje njen pravni status, organizacija, nadležnosti, način uspostavljanja i nadležnosti stručnih i rukovodnih tijela, finansiranje i druga pitanja u vezi s radom Agencije.

### **DIO DRUGI - STATUS I ORGANIZACIJA AGENCIJE**

#### **Član 2. (Status i sjedište Agencije)**

- (1) Agencija ima status samostalne upravne organizacije koja ima svojstvo pravnog lica.
- (2) Agencija ima pečat i štambilj u skladu sa zakonom.
- (3) Vijeće ministara Bosne i Hercegovine će posebnom odlukom odrediti sjedište Agencije.

#### **Član 3. (Osnivanje područnih jedinica)**

- (1) Pored sjedišta, Agencija osniva i područne jedinice.
- (2) Vijeće ministara Bosne i Hercegovine će posebnom odlukom odrediti sjedišta područnih jedinica Agencije.

## **DIO TREĆI - NADLEŽNOSTI AGENCIJE**

### **Član 4.**

#### **(Uspostavljanje standarda u predškolskom, osnovnom i srednjem obrazovanju)**

Agencija je nadležna za uspostavljanje standarda znanja, ocjenjivanje postignutih rezultata i razvoj zajedničkog jezgra nastavnih planova i programa u predškolskom, osnovnom i srednjem obrazovanju, i za druge stručne poslove u oblasti standarda znanja i ocjenjivanja kvaliteta koji su određeni posebnim zakonima i drugim propisima.

### **Član 5.**

#### **(Uspostavljanje standarda znanja i ocjenjivanja)**

U oblasti uspostavljanja standarda znanja i ocjenjivanja postignutih rezultata, u predškolskom, osnovnom i srednjem obrazovanju, i za druge stručne poslove u oblasti standarda znanja i ocjenjivanja kvaliteta obrazovanja, Agencija je nadležna za:

- a) ustanovljavanje standarda znanja učenika i ocjenjivanje postignutih rezultata,
- b) provođenje istraživanja s ciljem ocjenjivanja razvoja standarda znanja učenika, ocjenjivanje postignutih rezultata i objavljivanje rezultata istraživanja,
- c) davanje savjeta nadležnim obrazovnim vlastima u vezi s pitanjima propisanih standarda znanja i njihove primjene,
- d) ustanovljavanje i vođenje mehanizama izvještavanja o stanju obrazovanja u Bosni i Hercegovini u saradnji s nadležnim obrazovnim vlastima,
- e) sakupljanje, objedinjavanje, obrađivanje i objavljivanje podataka o kvalitetu i kvantitetu znanja,
- f) provođenje eksternog ocjenjivanja,
- g) davanje smjernica za provođenje programa obuke za nastavnike i stručne saradnike iz oblasti standarda znanja i eksternog ocjenjivanja,
- h) uspostavljanje kontakta s tijelima koja imaju slične funkcije u drugim zemljama kao i s međunarodnim organizacijama i institucijama s ciljem usklađivanja propisanih standarda u obrazovanju,
- i) pružanje pomoći pri priznavanju domaćih svjedočanstava i diploma u drugim zemljama, kao i u priznavanju stranih svjedočanstava i diploma u Bosni i Hercegovini,
- j) provođenje drugih aktivnosti u vezi sa uspostavljanjem i primjenom standarda znanja i ocjenjivanja.

### **Član 6.**

#### **(Razvoj zajedničkog jezgra nastavnih planova i programa)**

U oblasti razvoja zajedničkog jezgra nastavnih planova i programa u predškolskom, osnovnom i srednjem obrazovanju, Agencija je nadležna za:

- a) praćenje implementacije zajedničkog jezgra nastavnih planova i programa,
- b) praćenje, evaluaciju, usavršavanje i razvoj zajedničkog jezgra nastavnih planova i programa, u skladu sa standardima utvrđenim Okvirnim zakonom o osnovnom i srednjem obrazovanju u Bosni i Hercegovini ("Službeni glasnik BiH", br. 18/03),

- c) ostvarivanje saradnje s pedagoškim zavodima i drugim institucijama za podršku, modernizaciju i razvoj predškolskog, osnovnog i srednjeg obrazovanja,
- d) davanje savjeta nadležnim obrazovnim vlastima o izradi i implementaciji novih programskih sadržaja (silabusa),
- e) davanje smjernica za pripremu programa za provođenje obuke nastavnika i drugih obrazovnih stručnjaka u primjeni nastavnog plana i programa,
- f) saradnju s Komisijom za izradu nastavnog plana i programa za predmete dopunske nastave iz grupe tzv. nacionalnih predmeta za učenike osnovnih i srednjih škola - državljana Bosne i Hercegovine u inozemstvu,
- g) provođenje drugih aktivnosti u skladu s ovim zakonom i drugim zakonima koji se odnose na standarde u predškolskom, osnovnom i srednjem obrazovanju.

## **DIO ČETVRTI – STRUČNA I RUKOVODNA TIJELA AGENCIJE**

### **POGLAVLJE I. STRUČNO TIJELO AGENCIJE**

#### **Član 7. (Odbor Agencije)**

- (1) Odbor Agencije za predškolsko, osnovno i srednje obrazovanje (u daljnjem tekstu: Odbor) stručno je tijelo koje se uspostavlja u okviru Agencije.
- (2) Odbor čini sedam članova, i to po dva iz svakog konstitutivnog naroda i jedan član iz reda ostalih.
- (3) Ministarstvo civilnih poslova Bosne i Hercegovine raspisuje javni konkurs za izbor članova Odbora i objedinjenu listu prijavljenih kandidata koji ispunjavaju uslove i daje na mišljenje Konferenciji ministara obrazovanja u Bosni i Hercegovini.
- (4) Odbor imenuje Vijeće ministara Bosne i Hercegovine.
- (5) U radu Odbora učestvuje predstavnik Ministarstva civilnih poslova Bosne i Hercegovine bez prava glasa.
- (6) Članovi Odbora imenuju se na mandat od tri godine.

#### **Član 8. (Način rada i podzakonski akti Odbora)**

- (1) Odbor odluke donosi u skladu s ovim zakonom.
- (2) Ostala pitanja u vezi s načinom rada Odbora uređuju se Poslovníkom o radu Odbora Agencije za predškolsko, osnovno i srednje obrazovanje (u daljnjem tekstu: Poslovník o radu).

(3) Članovi Odbora biraju između sebe predsjedavajućeg Odbora i to na mandat od jedne godine, u skladu s Poslovníkom o radu.

(4) Odbor o svim pitanjima odlučuje većinom glasova od ukupnog broja članova s tim da se u većini glasova nalazi po jedan glas predstavnika konstitutivnih naroda.

### **Član 9. (Razrješenje Odbora)**

(1) Ako ocijeni da Odbor ne ostvaruje svoju funkciju, i prije isteka mandata na koji je Odbor imenovan, ministar civilnih poslova Bosne i Hercegovine može predložiti Vijeću ministara Bosne i Hercegovine razrješenje Odbora, odnosno pojedinog člana Odbora.

(2) O prijedlogu za razrješenje članova ili člana Odbora pribavlja se mišljenje Konferencije ministara obrazovanja u Bosni i Hercegovini.

### **Član 10. (Nadležnost Odbora)**

Odbor ima nadležnost da:

- a) uspostavlja standarde znanja učenika i ocjenjivanja postignutih rezultata,
- b) odobrava zajedničko jezgro nastavnih planova i programa osnovnog i srednjeg obrazovanja i objavljuje ga u "Službenom glasniku BiH",
- c) daje savjete, tumačenja i preporuke nadležnim obrazovnim vlastima u pitanjima iz svoje nadležnosti,
- d) ustanovljava i vodi mehanizme informiranja i izvještavanja o pitanjima iz svoje nadležnosti,
- e) razmatra provedena istraživanja iz djelokruga Agencije i objavljuje rezultate istraživanja,
- f) uspostavlja i ostvaruje kontakte s tijelima koja imaju slične funkcije u drugim zemljama kao i s međunarodnim organizacijama i institucijama s ciljem da propisani obrazovni standardi u Bosni i Hercegovini budu uporedivi sa standardima evropskih zemalja,
- g) donosi smjernice za provođenje programa obuke nastavnika i stručnih saradnika.

## **POGLAVLJE II. RUKOVOĐENJE AGENCIJOM**

### **Član 11. (Direktor Agencije)**

(1) Agencijom rukovodi direktor imenovan u skladu sa Zakonom o ministarskim imenovanjima, imenovanjima Vijeća ministara i drugim imenovanjima BiH ("Službeni glasnik BiH", br. 37/03). Direktor ima dva zamjenika koji su rukovodioci područnih jedinica i imenuju se na isti način.

(2) Direktora Agencije i zamjenike direktora imenuje Vijeće ministara Bosne i Hercegovine na mandat od četiri godine.

(3) Direktori i zamjenici direktora ne mogu biti iz istog konstitutivnog naroda.

(4) Direktor Agencije za svoj rad i rad Agencije u cjelini odgovara Vijeću ministara Bosne i Hercegovine.

### **Član 12. (Nadležnosti direktora)**

Direktor Agencije:

- a) rukovodi i usmjerava obavljanje poslova u nadležnosti Agencije;
- b) odgovoran je za provođenje odluka Odbora i drugih nadležnih organa;
- c) priprema materijale o kojima raspravlja i odlučuje Odbor;
- d) priprema plan rada Agencije i podnosi izvještaj o radu;
- e) priprema finansijski plan Agencije i podnosi finansijski izvještaj;
- f) u skladu sa zakonom, odgovoran je za pitanja radnih odnosa;
- g) ostvaruje neophodnu saradnju s nadležnim obrazovnim vlastima u entitetima, kantonima i Brčko Distriktu Bosne i Hercegovine;
- h) podnosi Vijeću ministara Bosne i Hercegovine godišnji izvještaj o radu;
- i) obavlja druge poslove u skladu sa zakonom i podzakonskim aktima, te aktima Agencije.

### **Član 13. (Pravilnik o unutrašnjoj organizaciji Agencije)**

- (1) Direktor Agencije, uz konsultacije s rukovodiocima područnih jedinica, donosi Pravilnik o unutrašnjoj organizaciji, uz prethodnu saglasnost Vijeća ministara Bosne i Hercegovine.
- (2) Pravilnik o unutrašnjoj organizaciji obavezno definira nadležnosti područnih jedinica.

## **DIO PETI - FINANSIRANJE**

### **Član 14. (Finansiranje i samofinansiranje Agencije)**

(1) Sredstva za rad Agencije osiguravaju se u Budžetu institucija Bosne i Hercegovine i međunarodnih obaveza Bosne i Hercegovine od 1.1.2007. godine.

(2) Agencija može imati vlastite prihode i prihode iz drugih izvora.

## **DIO ŠESTI- NADZOR**

### **Član 15. (Nadzor)**

Nadzor nad primjenom ovog zakona vrši Ministarstvo civilnih poslova Bosne i Hercegovine.

## **DIO SEDMI - PRIJELAZNE I ZAVRŠNE ODREDBE**

### **Član 16. (Prestanak rada Agencije za standarde i ocjenjivanje u obrazovanju za Federaciju Bosne i Hercegovine i Republiku Srpsku)**

(1) Prestanak rada, preuzimanje arhive, opreme i zaposlenih Agencije za standarde i ocjenjivanje u obrazovanju za Federaciju Bosne i Hercegovine i Republiku Srpsku (u daljnjem tekstu: Agencija za standarde i ocjenjivanje u obrazovanju za Federaciju BiH i Republiku Srpsku ) regulirat će se sporazumom koji će zaključiti Vijeće ministara Bosne i Hercegovine, Vlada Federacije Bosne i Hercegovine i Vlada Republike Srpske.

(2) Postupak zaključivanja sporazuma iz stava (1) ovog člana provodi se najkasnije u roku od tri mjeseca od dana stupanja na snagu ovog zakona.

### **Član 17. (Usklađivanje propisa)**

(1) Stupanjem na snagu ovog zakona prestaju važiti čl. 46., 47. i 48. Okvirnog zakona o osnovnom i srednjem obrazovanju u Bosni i Hercegovini ("Službeni glasnik BiH", br. 18/03).

(2) U skladu s ovim zakonom, u roku od tri mjeseca od dana stupanja na snagu ovog zakona vlade entiteta stavit će van snage Odluku o osnivanju Agencije za standarde i ocjenjivanje u obrazovanju za Federaciju BiH i Republiku Srpsku ("Službene novine Federacije BiH", br. 28/00) i Odluku o osnivanju Agencije za standarde i ocjenjivanje u obrazovanju za Federaciju BiH i Republiku Srpsku ("Službeni glasnik Republike Srpske", br. 42/01).

**Član 18.**  
**(Stupanje na snagu)**

Ovaj zakon stupa na snagu osmog dana od dana objavljivanja u "Službenom glasniku BiH".

PSBiH broj 123/07  
30. oktobra 2007.godine  
Sarajevo

**Predsjedavajući  
Predstavničkog doma  
Parlamentarne skupštine BiH**

**dr. Milorad Živković**

**Predsjedavajući  
Doma naroda  
Parlamentarne skupštine BiH**

**Ilija Filipović, dipl.iur.**